

Y' é_é vouolu prèdjé le patouê
Li yô la tsanson_on mouere jamê,
Li yô li dzin l' on teti prèdja
La bal'a linvoueu dè no z' anfian.

I no fô mantèni sé biô patouê
Li yô no parin l' on teti vouardô,
Li yô li vegne l' on teti baya
Dè biô rezin bin_in anmô.

Dedin la tanne dè Moutagnon
Li Brindèyeü son sovin asinblô.
Ami patouêzan rasinbl'in no
Pouo mantèni sé biô prezin.

Bèy'on on vaïre, alin teti
Pâ on gaban kiè pouerè vèni
Tinke le vîn dè l'amitché
É la mouezèk no farin dansié.

Vouard'in no vegne a to jamê
É kè li bon vîn rèstav'on vê no.
Son li Brindèyeü, pâ li doteu,
Kiè fon li bal'a venindze.

I no fô tsantâ no bal'a vegne
Li yô li dzin l'on inkouo la faï,
Li yô la faï la teti baya
Li biô rezin dè la li bé ra mé.